

Lesley Griffiths AS
Minister for Environment, Energy and Rural Affairs

30 Gorffennaf 2020

Annwyl Lesley,

Diolch am eich presenoldeb yng nghyfarfod y Pwyllgor ar 9 Gorffennaf. Mae'r Pwyllgor wedi cytuno y dylwn ysgrifennu atoch yn sgil nifer o faterion a gododd yn ystod y cyfarfod hwn. Byddwn yn ddiolchgar pe gallech ymateb i'r cwestiynau isod erbyn 10 Medi, er mwyn llywio trafodaethau yng nghyfarfod y Pwyllgor ar 17 Medi, yr ydych wedi cytuno i fod yn bresennol ynddo.

Pysgodfeydd

1. Gwnaethoch ddweud wrth y Pwyllgor eich bod wedi gobeithio gwneud datganiad ar bolisi pysgodfeydd y dyfodol ym mis Mawrth, ond bod y datganiad hwn wedi'i oedi oherwydd y pandemig COVID-19. A allwch ddweud wrth y Pwyllgor pryd yr ydych yn disgwyl gallu gwneud y datganiad hwnnw?
2. O ran Grant Pysgodfeydd Cymru, gwnaethoch ddweud wrth y Pwyllgor fod 120 o longau wedi cael dros £0.5 miliwn mewn cymorth grant. A allwch gadarnhau beth yw diben y grant hwn a sut y byddwch yn asesu a yw'r grant wedi bod yn effeithiol?
3. Mae cyfanswm y grant, sef £0.5 miliwn, yn golygu y rhoddwyd tua £4,000 ar gyfartaledd i bob llong. A allwch gadarnhau eich bod yn fodlon bod y cyllid hwn yn ddigonol? Pa gynlluniau sydd gennych ar gyfer cymorth ariannol ychwanegol i'r sector hwn i helpu ei adfer?
4. Yn ystod y sesiwn dystiolaeth, gwnaethoch gyfeirio at sawl esiampl o bysgota anghyfreithlon. A allwch roi manylion i'r Pwyllgor am lefelau gweithgarwch anghyfreithlon



Senedd Cymru

Bae Caerdydd, Caerdydd, CF99 1SN

 SeneddNHAMG@senedd.cymru

 0300 200 6565

Welsh Parliament

Cardiff Bay, Cardiff, CF99 1SN

 SeneddCCERA@senedd.wales

 0300 200 6565

yn ystod y cyfnod presennol lle nad yw llongau gorfodi wedi bod yn goruchwyllo dyfroedd Cymru? A allwch gadarnhau bod pob cwch gorfodi bellach yn weithredol?

Yr amgylchedd

5. Rydym wedi clywed bod oedi o ran taliadau o'r Cynllun Rheoli Cynaliadwy wedi achosi problemau i rai cyrff anllywodraethol. A allwch roi'r wybodaeth ddiweddaraf i'r Pwyllgor am y sefyllfa ddiweddaraf ac amlinellu, os oes problemau sydd heb eu datrys eto, yr amserlen ar gyfer datrys y problemau hyn?
6. Yn ystod y sesiwn, gwnaethoch gyfeirio at yr angen i sicrhau adferiad gwyrdd yn dilyn y pandemig COVID-19. A allwch amlinellu'r cynlluniau ar gyfer adferiad gwyrdd yng Nghymru? A ydych yn bwriadu cyhoeddi cynllun neu strategaeth fel bod modd i bobl eraill weld y trywydd yr ydych yn bwriadu ei ddilyn?
7. Sut y bydd Aelodau o'r Senedd ac aelodau o'r cyhoedd yng Nghymru yn gallu beirniadu a yw Llywodraeth Cymru wedi sicrhau adferiad gwyrdd?
8. A allwch ddarparu manylion am ddiben ac aelodaeth y tasglu bioamrywiaeth? Mae £0.5 miliwn o gyllid wedi'i ddyrannu i'r tasglu hwn, felly pa ganlyniadau ydych chi'n eu disgwyl yn sgil eich buddsoddiad?

Cyfoeth Naturiol Cymru

9. Beth yw'r sefyllfa ddiweddaraf ynghylch bwch cyllido disgwylidig Cyfoeth Naturiol Cymru?

Bwyd

10. A allwch roi'r wybodaeth ddiweddaraf am safbwynt diweddaraf Llywodraeth Cymru ynghylch profi am COVID-19 mewn ffatrioedd prosesu bwyd?
11. A allwch roi'r wybodaeth ddiweddaraf i'r Pwyllgor am y cyllid sydd wedi'i ddyrannu i'r fenter #CaruCymruCaruBlas ac sydd wedi'i wario gan y fenter hon?
12. A allwch gyflwyno i'r Pwyllgor eich asesiad presennol o ddiogelwch bwyd yng Nghymru, gan gynnwys gwytnwch cadwyni cyflenwi? A ydych yn credu bod angen cymryd unrhyw gamau i atgyfnerthu'r gwytnwch hwn yn sgil ail don bosibl o COVID-19 (a chyfyngiadau cysylltiedig) yn ystod y gaeaf?
13. A allwch roi'r wybodaeth ddiweddaraf i'r Pwyllgor am yr amserlen ar gyfer eich ymateb i'r ymgynghoriad mewn perthynas â'r cod cyflenwi nwyddau groser?



Brexit a fframweithiau cyffredin

14. A allwch roi'r wybodaeth ddiweddaraf i'r pwyllgor am unrhyw faterion perthnasol a drafodwyd yng nghyfarfod y grŵp rhyngweinidogol a gynhaliwyd ar 29 Gorffennaf?

Llifogydd

15. Byddwn yn ddiolchgar pe gallech ddarparu copi o'ch strategaeth ar gyfer llifogydd pan gaiff ei chyhoeddi fis Medi.

16. Gwnaethoch ddweud wrth y Pwyllgor fod cyllid sylweddol wedi'i roi i awdurdodau lleol i'w galluogi nid yn unig i gynnal ymchwiliadau ond i gyhoeddi'r canfyddiadau cyn darparu seilwaith, yn ôl yr angen, i atal llifogydd yn y dyfodol. Faint o gyllid sydd wedi'i ddyrannu at y diben hwn?

17. A ydych yn credu bod lefel bresennol y cyllid a ddarperir i awdurdodau lleol i ddelio â llifogydd yn ddigonol, o ystyried y cynnydd mewn achosion o lawiad eithafol? A ydych yn credu y bydd angen rhagor o gyllid i helpu awdurdodau lleol i ymateb i lifogydd yn ystod y gaeaf eleni?

18. Pryd ydych yn disgwyl i awdurdodau lleol gyhoeddi'r canfyddiadau sy'n deillio o'r gwaith a gyllidwyd?

19. Pa mor fodlon ydych chi fod y camau angenrheidiol wedi'u cymryd i atal llifogydd rhag digwydd eto?

Newid yn yr hinsawdd

20. Pa asesiad ydych chi wedi'i wneud o'r effaith ar lefelau allyriadau o ganlyniad i newid ymddygiad neu benderfyniadau busnes sy'n deillio o'r pandemig COVID-19?

21. A fyddwch yn cyhoeddi ymateb ffurfiol gan Lywodraeth Cymru i'r adroddiad a luniwyd gan y grŵp o dan arweiniad Chris Joffeh, a oedd â'r dasg o drafod cost ôl-osod cartrefi yng Nghymru, ymhlith materion eraill?

Lles anifeiliaid

22. Gwnaethoch ddweud wrth y Pwyllgor y byddwch yn cyflwyno Bil mewn perthynas â gwerthu cŵn bach gan drydydd parti. Yn y gorffennol, mae Llywodraeth Cymru wedi awgrymu y byddai'n ymdrin â'r mater hwn drwy is-ddeddfwriaeth o dan Ddeddf Lles Anifeiliaid 2006. A allwch gadarnhau a fyddwch yn deddfu ar y mater hwn drwy ddeddfwriaeth sylfaenol neu drwy is-ddeddfwriaeth?

23. Gwnaethoch gadarnhau bod ail ymgynghoriad cyhoeddus yn cael ei gynnal ar y mater hwn. A allwch gadarnhau eich bod yn bwriadu cynnal ymgynghoriad ar destun y



ddeddfwriaeth ddrafft?

24. A allwch roi'r wybodaeth ddiweddaraf i'r Pwyllgor am safbwynt diweddaraf Llywodraeth Cymru ynghylch cynllun i helpu perchnogion anifeiliaid anwes bregus i dalu costau milfeddygol?

Amaethyddiaeth

25. Beth yw'r amserlen ar gyfer ymateb i adroddiad Swyddfa Archwilio Cymru ar gyllid o'r rhaglen datblygu gwledig?

26. Dywedodd eich swyddog wrth y Pwyllgor fod cyllideb Llywodraeth Cymru yn cynnwys darpariaeth i dalu cosbau ariannol. Faint o arian sydd wedi'i neilltuo at y diben hwn?

27. Pa ystyriaeth ydych chi wedi'i rhoi i ddarparu cymorth parhaus ar gyfer digwyddiadau a sefydliadau sy'n canolbwyntio ar gymunedau gwledig yn sgil y cyfyngiadau o ganlyniad i'r pandemig COVID-19?

Yn gywir,



Mike Hedges AS
Chair of Climate Change, Environment and Rural Affairs Committee

Croesewir gohebiaeth yn Gymraeg neu Saesneg.
We welcome correspondence in Welsh or English.

